

7,927/B

L XIII

DISSERTATIO INAUGURALIS MEDICO - PRACTICA,
DE
**SINGULARI MERCURII
DULCIS USU**
IN DESPERATIS QUIBUSDAM MORBIS,

Q V A M
AUSPICE DEO PROPITIO
Et Consensu atque Auctoritate Gratiſſæ Facultatis Medicæ,
IN ALMA REGIA FRIDERICIANA,

P R Æ S I D E
DN. D. MICHAELE ALBERTI,

POTENTISSIMI REGIS BORUSSIÆ CONSILIARIO AULICO,
MEDICINÆ ET PHILOSOPHIÆ NATURALIS PROFESSORE PUBLICO ORDINARIO,
FACULTATIS MEDICÆ DECANO SPECTATISSIMO,

Domino Patrono, Præceptore ac Promotore suo omni honoris cultu prosequendo,


P R O L I C E N T I A
SUMMOS IN MEDICINA HONORES, ET PRIVILEGIA
DOCTORALIA LEGITIME IMPETRANDI

HORIS LOCOQUE CONSVETIS,

ANNO MDCCXXIV. D. SEPT.

PUBLICAE AC PLACIDAE ERUDITORUM VENTILATIONI SUBJICIET,
RESPONSURUS AUCTOR

JOANNES HAVIGHORST,
RHENA WESTPHALUS.



HALÆ MAGDEBURGICÆ,
Typis IOANNIS CHRISTIANI HENDELII, Acad. Typogr.





PRAEFATIO.



Tupenda mercurii natura omnium oculos in se conuertit, eademque, ut credibile est, primum chymiatros desiderio inflammavit experiundi, *quali vi* aut per se hominem adgredere-
tur, aut aliis formis indutus ad

Vsus mercurii medicus

medendum aegris corporibus valeret.

Paullatim igitur periclitando, vt primum ARABES mercurii vsum in vlceribus efficacem esse cognouerunt, praeceunte postmodum in primis THEOPHRASTO PARACELSO complures nostro sub caelo facti sunt alacriores, ad mercurium crebris variarum operationum tentaminibus subiiciendum, et quae inde oriebantur producta aegrotantibus subinde applicanda.

1) repertus ab Arabibus

2) propagatus a Paracelso.

Etsi autem hi mentem Helvetii huius antesignani multis aenigmatibus inuolutam extricare et iactatorum ab eo arcanorum notitiam consequi raro, aut nunquam potuerint; acriter tamen conten-

3) excultus ab huius aetate sectis.

tione non mediocres nec spernendos in hoc studio *progressus fecisse*, et permulta ante hac incognita, frementibus licet GALENICIS, *in lucem protulisse*, ipsumque potentissimum e mercurio venenum in salutare medicamen *transformasse* apparet.

Vnde varia
mercurii
praeparata
inter quae

Progrediente aetate et solerti artificum diligentia, sensim hinc manauit tanta generosiorum *mercurialium remediorum multitudo*, vt hodie pharmacia chymica admirando hoc naturae foetu velut praecipuo quodam columine subniti quibusdam videatur.

multa interne
intusa

Nec facile quisquam inficiabitur, non pauca beneficio solutionis, praecipitationis aut sublimationis aliis ex rebus cum mercurio componi, quibus in diuersis morbis seu laesionibus ad sanitatem redintegrandam optato cum fructu medici vtuntur; quamquam simul fatendum est, multorum, quae prostant, mercurialium effectuum infra spem subsistere, quaedam etiam non solum nimis laudibus onerari, quas prouida recentiorum experientia non agnoscit; verum quoque alia (vt *mercurium praecipitatum rubrum*, *turpethum minerale* etc.) intus data, infidam vim edere et periculosis identidem incommodis aegrum adfligere, alia vt *mercurium sublimatum*, quem CONSULTISSIMUS PRAESES *temerarium* chirurgorum imperitorum *remedium* vocat, (a) pestem et exitium moliri.

pauca probata

Quapropter ad internum praecipue vsum *dele-
ctum*

(a) In succincta sua materia medica Sect. III. pag. 481.

Etum mitiorum mercurialium, quorum salubritatem quotidiana praxis euincit, habendum esse, cum aliis circumspectis Medicis sentio.

Atque inter haec fere virtutibus suis eminent, *vti praecipue* vel saltem notissima satisque frequentibus experimentis probata sunt *cinnabaris* & *mercurius dulcis*, vtraque ad praescriptum optimorum Chymicorum exacte confecta.

Sic *illa* quidem egregium nobis sedatium praebet in effera motuum intensione, spasmis, variisque doloribus et congestionibus praestans, omnibusque opiatis fere tutius et conuenientius. (b) *1) Cinnabaris*

Mercurius dulcis vero, exigua doseos mole, sapore non ingrato, effectus satis placido et polychresto adeo se commendat hodiernis Chymiatris, vt ad expugnandas varias aegritudines frequentissime in subsidium aduocetur. *2) mercurius dulcis*

De cuius usu dum in praesentiarum differere in animum induxi, equidem non ignoro vires illius iam ab aliis late praedicatas et publicae luci expositas fuisse; sed tamen, cum duce experientissimo viro Dn. D. IVNCKERO, PRAECEPTORE meo aetatem colendo *singularis* mihi *methodus* mercurii dulcis adhibendi innotuerit, quam et efficacissimam in rebellibus quibusdam malis superandis expertus sum, et nusquam alibi pro dignitate plani-

A 3

US

(b) vid. D. D. PRAESES l. c. p. 484. Excell. HOFFMAN-
NVS in disp. de mercurio et medicament. select. mercurial.
Thes. XVI. p. 27.

us euolutam exstare memini; non praereptam sed datam mihi esse occasionem putaui, hanc materiam sub finem studiorum meorum academicorum cum Practicis communicandi. Sicut ergo id potissimum erit speciminis huius argumentum, ita DEVM T. O. M. supplicibus votis venerabundus inuoco, vt primos hosce conatus gratia sua secundare, eosdemque ad nominis sui gloriam hominumque salutem dirigere clementissime dignetur.

CAPVT I.

DE VSV MERCVRII DVLCIS VVLGARI.

§. I.

*Omissae
praeparationis
rationes,*

Non dubito fore plerosque, qui (vti in fusioribus dissertationibus fieri solet) explicationem *principiorum* tam mercurii sublimati, quam mercurii currentis, ex quibus hoc concretum conflatur, hic desiderabunt, nec contenti erunt, vbi dulcis illius mercurii *praeparationem* multis exquisitis cautionibus circumscribendam a me prorsus neglectam esse intuentur. At hi dum ne grauentur auscultare paullulum *rationes* quae me ad id agendum potissimum impulerunt, facile, vt credo, mecum in gratiam redibunt. Vti enim iam in praeloquio monui, statutum mihi est hoc sollempni specimine mercurii dulcis seu draconis, vt quidam vocant, mitigati vsum tum satis cognitum et in vulgus editum, tum praecipue singularem, prout peculiari methodo datus ad felicissimam desperationum quorundam morborum curationem nobis inservit,

viii,

viit, describere. In quo dum satis amplam differendi materiam mihi nactus videor, superfluum et a proposito meo seiunctum foret, principia et praeparationem ab aliis traditam hic repetere, praesertim cum hodiernorum chymicorum solertia modum elaborandi tam clare et prouide publicis in scriptis docuerit, vt nihil addi possit luculentius.

§. II.

Primum igitur vulgarem mercurii dulcis vsum breui praelusione explicaturus, antequam vltra progrediar, paucis occurrendum puto eorum *obiectionibus*, qui non tantum debitis ei laudibus detrahunt, sed e pharmacorum classe ipsum plane relegandum arbitrantur; caussati, *virus* illius non domitum sed leuibus solum inuolucris occultatum esse; mercurium sublimatum scilicet larua solum curentis indui, ceterum his aliisque artificiis nequam coërceri, quin ferali vehementia in viscera nostra saeuire possit; immo etiam licet mercurius dulcis insipidus ac omnis fere acrimoniae expers sit, tamen eum, simulatque in humores nostros sese insinuet, a particulis horum acidis, salinis, ponticis *exacui* et infestissimam arrodentem qualitatem recuperare.

*Obiectio de
viru huius
Mercurii.*

1.

2.

§. III.

Speciosus fateor hic color et speculatio est, quae multos ab vfu huius remedii deterruit. Neque a priori euidentes et inuictae rationes suppetunt, cur mercurii viui satis larga additio validissimum venenum in salutarem medicinam conuertat, nisi quod generatim acidum salis communis concentratum, quod mercurio sublimato abundantius inhaeret, a viuo adiecto et interposito saturari, adeoque vim eius septicam, quem cum paucioribus mercurii moleculis subtiliter solutis ediderat, infringi dicere possimus.

*Responsio ad
obj. 1.*

*1) a priori
difficilis*

§. IV.

Sed profecto cum mercurium sublimatum album

*2) a sapore et
gu-*

effectu ex-
terno.

gustatu asperrimum esse et praesentissimam vim suam terribili rosione partes corporis adgrediendi ac destruendi exercere, contra mercurium dulcem *insipidum* existere, et in ipsa solutione continui e.g. vlceribus venereis impuritates *segnius consumere* et emendare, ac de reliquo extus detergentis qualitatis participem esse nouimus; tum ex eo iam probabiliter colligi potest, internum illius vsum non tantum periculi creare, quantum chymiae hostes, aut alii praeconceptionis opinionibus imbuti fingunt potius, quam iustis de causis reformidant.

§. V.

3) Ab experientia recentiorum.

Quid autem opus est his immorari? cum *recentiores* iidemque felicissimi Practici haec omnia iam extra ambiguitatis aleam posuerint et mercurii dulcis efficaciam non modo *tutissimam* sed et in permultis affectibus internis leniendis, aut debellandis *saluberrimam*, infinitis propemodum exemplis comprobarint. Ex quo fit, vt qui hodie ipsum suspitione veneni onerare adhuc sustinet, plurimis se deridendum praebeat.

§. VI.

Resp. ad
obj. 2.

1) a priori

2) posteriori

His itaque facile quis acquiescere potest, nisi forte suspicetur mercurium dulcem a cacochymicis humoribus denuo *exacui* et grauiter nocendi vim recuperare. At sane neque haec obiectio tanti valet, vt scrupulos nobis iniicere, vsumque mercurii dulcis suspectum reddere possit. Nam et *a priori* nusquam salia in tanta ubertate apparent, quae magnam habeant potestatem mercurii in spicula feralia exasperandi, et si aliquando praesto essent in corpore nostro, tamen haud ita prompte se mercurio adiungerent. *A posteriori* vero experientia idem meridiana luce clarius demonstrat, plurimosque in nulum incommodum, ne dicam grauius a veneno metuum periculum incucurrisse testatur. Quapropter etiam alii hic nodum in scirpo quaeri et nimiam plerumque formidinem inani quodam praetextu regi iudicant.

cant. Quamuis de cetero ad qualemcunque molestiam praeuertendam consultum sit praecipue in illis, quos largiori acido primarum regionum aut acris humorum corruptelis obnoxios videmus, mercurii dulcis usum commodo quodam absorbente comitari.

§. VII.

Sed iam oblocuturos praeuideo, tristia passim etiam *documenta* exstare, quae *noxium et lethiferum effectum*, quem mercurius dulcis vel potius compositio pro eo venditata interdum *edidisse* legitur, aperuerunt, adeoque conceptam de venenata eius indole opinionem confirmasse videntur. *exempla in contrarium*

§. VIII.

Neque negamus hoc factum esse; quod si autem paulo diligentius in tragicorum eiusmodi euentuum causas inquirere libeat, patebit longe aliter, ac quidam interpretati sunt, se rem habuisse, et vel praescribentium *errorem* vel *incuriam* et inscitiam famulorum, qui in officinis pharmaceuticis talem mercurium oscitanter elaborarant, vel utentium *imprudentiam* aut *deploratam constitutionem* etc. iure arguendam fuisse. Quod ut paucis declarem notissimum est referente B. WEDELIO (c), in dispensatorio Augustano pluribus annis sub titulo mercurii dulcis parandi usitatam fuisse proportionem mercurii sublimati vnc. VIII. ad mercurii viui vnc. VI. ex qua si perfunctorio labore mercurius dulcis conficiatur, infidos et funestos nonnunquam effectus prodiisse non est mirandum. Sic alibi aliae cautiones, in praeparatione necessariae, neglectae sunt; alibi in *doseos mole* error commissus, uti obseruatio constat (d) de viro, qui vnciam semis mercurii dulcis bene praeparati assumsit, et intra XXIV. horas diem obiit supremum; alibi acriorum rerum *admixtione*, *nihil probant*

B

aut

(c) vid. disp. de mercurio dulci,

(d) in M. N. C.

aut non satis perpensis aegri aetate viribus morbi tempore aliisque circumstantiis, a recta medendi methodo aberratum est, ut illictuosa talium peccatorum exempla excell. viri WEDELIVS, STAHLIVS et HOFFMANNVS publicarunt (e).

§. IX.

*Opus tamen
est circum-
spectione.*

Iniurii ergo in mercurium dulcem sunt, qui culpam noxarum ex aliis causis orientium ipsi temere impingunt, indeque veneni stigma inurere conantur. Quod si enim rem recta nobiscum reputemus, nihil est, quod iustum cuiquam timorem possit incutere, dummodo quis de legitima eius praeparatione certissimus sit, eaque omnia praecepta, quae sicut in aliorum medicamentorum, ita et in huius praesidii vsu tenenda sunt, probe exerceat et in aegrotantium salutem conuertere norit.

§. X.

*Effectus
mercurii
dulcis gene-
ralis inter-
nus
1) colliquans*

Absterfis breuiter maculis, quas nimium scrupulosi mercurio dulci aspergere tentarunt, et innocentia eius vindicata, nunc eo maiore fiducia pergere licebit ad effectus illius tam generales, quam speciales plerisque medentium agnitos paucis, ut instituti ratio exigit, delibandos. Agit autem ille euidentius in lympham et serum mucidum, deprauatum, idque attenuat *colliquat*, et si congruente dosi propinetur, per intestina efficaciter educit; eo quidem utilior, magisque recipiendus, quo minus facile molesta adstrictionis aluinae incommoda, quae ab aliis praecipue resinosis catharticis saepissime remanent, postmodum relinquit. Quapropter inter *phlegmagoga* principem ferme locum sibi deposcit; atque a nostrae aetatis medicis ad formulas purgantes et laxantes frequentissime expe-

*2) cathartici-
cus*

(e) vid. Exc. HOFFMANNI Medic. consultat. Tom. I. Deci. V. cas. II. X. conf. Exc. STAHLII disp. de officio medic. circa casus chirurg. §. XLV. p. 40.

expetitur. Porro cum viscidam dictorum humorum spissitudinem corrigit, tum etiam idoneus censetur ad prognatas inde glandularum aliorumque tubulorum obstructions *referandas*. 3) *aperiens*

§. XI.

Inprimis vero *anthelminticam* illius virtutem practici non immerito celebrant. Etsi enim omnia mercurialia vermibus perniciem et internecionem minentur; tamen cum mercurius dulcis eosdem non solum tuto extinguat, sed e finibus corporis simul proscribere soleat, credo non falli, qui quandam ei praerogatiuam tribuendam esse contendunt. Et sane si cuiquam praesidio tantum sit fidendum, ut hospites tales molestos, qui subinde contumacissimi sunt et ad mortem usque aegros diuexant atque exhauriunt, eiicere queat; certe in hoc potissimum mercurio spem auxilii collocari posse existima- verim, memor eorum, quae passim de huiusmodi optato usu practici litteris (f) mandarunt: alique fide dignissimi impertire mihi voluerunt. (g) 4) *anthel-
minticus*

§. XII.

Denique etiam, si repetitis dosibus per aliquot dies praebeatur, hodie inclaruit huius mercurii vis *salua-
tionem* ciendi, quae utique ex sententia et prospere succedit, si debitis cautionum terminis circumcludatur. Ex- 5) *saluato-
rius*

B 2

terne

(f) vid. WEDEL. dissert. de merc. dulc. p. 31.

(g) Quo loco reminiscor casus a D. D. PRAESIDE communicati, cui aliquando contigit, ut puella atrocissimis et quasi daemoniacis conuulsionibus vexata, cum mercurio dulci non modo a stupenda vermium congerie, sed et ab eodem miserrimo morbo leberata fuerit. Pariter etiam a quodam celeb. Practico mihi relatum est, se duabus virginibus per frequentum usum mercurii dulcis ultra 500. vermes expulisse; omnem medicationem antea frustratos,

externus.

terne tandem mercurius dulcis abstergentem, mundificantem et efficacius colliquantem edit effectum, vti haec pariter ac superiora iam specialius sed tamen succincte explicabimus.

§. XIII.

*Effectus specialis internus**1) polychrestus**etiam in infantibus**2) in scirrhis**3) in scabie repulsa**4) in malis venereis*

Itaque in illorum morborum censu, quibus leuandis aut deuincendis mercurii dulcis vsus destinatur, praecipue se nobis offerunt, mala ex muco primas vias aggravante nata vt nausea, cardialgia frigida, colica pituitosa, item tussis catarrhalis asthma humidum, cachexia mucida, scabies, atrophia, in quibus attenuatione et correctione et euacuatione materiae spissioris viam optime munit ad perfectam medelam, atque in his tantum non omnibus aliis palmam dubiam reddit. Neque quicquam est, quod dubitare nos sinat, quin ipsis *infantibus* eiusmodi malorum genere afflictis vsus mercurii dulcis singulare leuamen vel auxilium polliceatur. Etsi enim quidam inde incommoda praemetuant, tamen e perpetuis documentis constat, hoc remedium, dummodo non plane teneris detur, in impuritate intestinorum pituitosa, atrophia infantum et tutissimum existere, et raro spem felicioris euentus frustrari. (b) Accedit quod verminosam colluuiem exterminet, tales morbos frequenter sustentantem, et subinde ad horridas motuum exacerbationes et conuulsiones ansam praebentem, ut antea monitum. Praeterea resoluendi scopo non inepte pertinacibus *scirrhis*, quos frustra saepe aliis tentaminibus oppugnamus, nonnunquam opponitur; nec deserit medentem in *scabie repulsa*, si quidem ipsum mature porrigendi faueat occasio: Denique specificè quasi emendare valet *corruptelas venereas*, adeoque in gonorrhoea, fluore albo, lue Gallica etc. non minimum spondere emolumentum ab omnibus fere

(b) conf. STAHL. Diss. de affect. infant. cap. 4. p. 33.

fere practicis confirmatur. Incongruens autem et *suspectus* eius vsus est ad *hypochondriacorum* sanguinem in statum magis fluidum reuocandum et *scorbuticam* labem corrigendam; nam complures inde acriora mala pullulare experti sunt, (i) ipsumque propterea in his morbis reiciendum esse censuerunt. (k)

suspectus in m. hypoch. et scorbuto

§. XIV.

Extrinfecus abstergentem et emundantem efficaciam edit in fordibus *serpiginosis*, herpete etc. quamuis non adeo crebro adhibeatur; itemque ad vsum *cosmeticum* vulgo traducitur. Verum hic tamen ETMVLLERVM audiendum esse arbitror, qui a frequenti mercurialium illitu, ubi primo faciem nitidiorum reddidit, defluuium capillorum, dentium nigrorem ac vacillationem, cutem scabram maioremque foeditatem denique [velut pulcherrimum vanitatis praemium] reportari obseruat. Tandem etiam eum ad *ulcerum venereorum* curationem in subsidium aduocari nouimus; praecipue si haec partes teneiores aut aliis de causis validiorum vsu prohibentes e.g. fauces obsideant. Cum autem alibi in fordibus lentis, et excrecente materia fungosa absumendis, segniores se gerere mercurius dulcis deprehendatur; tum si in locum eius praecipitatum rubrum dextre substituere sciamus, spes est nos citius ad scopum restaurandae lacionis esse peruenturos. (l)

Externus in serpiginosis ad fucum infidus

lenis in ulc. venereis

§. XV.

De modo adhibendi plura hic (m) attexere non libet, *modus adhibendi*

B 3

(i) conf. D. D. IVNCK. Tab. medic. Tab. XXXVI. p. 325. No. 16. it. Tab. XCI. p. 748.

(k) conf. D. D. PRAES. prax. cap. LXI. §. 5. No. 4.

(l) conf. D. D. IVNCKER. chirurg. Tab. XXXIX. p. 268. No. 2. it. DORINGIVS in epist. ad FABRIT.

(m) de dosi vid. cap. seq.

*in pilulis**et in pulvere*

ne praestitutos limites egrediamur. Illud haud plane abs re erit monere mercurium dulcem plerumque satis magna dosi inprimis cum aliis laxantibus in *pilularum* formam redactis praescribi, vulgoque metui, ne, si in *pulveris* forma detur, fauces arrodant, aliudue grauius detrimentum importet; quamquam nihil periculi subesse, dummodo probe comminutus et cum absorbente quodam et pulvere ialappae mistus praebetur, quotidiana nos abunde doceant experimenta.

CAPUT II.

DE VSV MERCVRII DVLCIS SINGVLARI.

§. I.

*Authores
praemittun-
tur mercu-
rium dul-
cem propi-
nantes.*

HActenus vsum mercurii dulcis vulgarem ea, quae proposito meo consentanea est, breuitate complexus, et iam methodum illius singularem, prout dissertationis titulus designat, fusius expositurus, non alienum esse duco, antequam ad rem ipsam me accingam, quid alii celeberrimi Practici de mercurii dulcis adhibendi ratione ad methodum nostram longius aut propius accedente senserint et publicis passim monumentis prodiderint, paucis aperire. Etsi enim neminem adhuc mihi resciscere licuerit, qui methodum nostram singularem publice explanauerit; tamen indicia, quae viam ei patefacere quodammodo queant, constare et ex alijs auctoribus depromi posse, minime negabo.

§. II.

*1) in larga
dosi uti.
Helwichi-
us.*

Ex his igitur, qui draconem hunc mitigatum leni ptyalismo mouendo consecrarunt alii *largiusculam dosin* fumendam esse praeceperunt vt HELWICHIVS (n) qui eum

(n) in Eph. N. C. Dec. III. Ann. 7. & 8. obs. 7.

eum ad scrupul. V. binis exemplis adhibuit, in alio subiecto vltra gr. LXXII. non ascendit et saluatio per 14. dies durauit. NENTERVS (o) exhibuit mercurium dulcem prima vice ad gr. XV. secunda scrup. I. tertia drachm. semis vsque ad drachm. I. donec saluatio oriatur. B. WEDELIVS (p) non facile vltra scrup. I. adscendere se memorat.

b Nenterus

c Wedelius.

§. III.

Alii *pauciora* tantum grana praescribi necesse arbitrati propiorem nostrae methodum elegerunt. Inter quos in praesentiarum mihi succurrit WEISBACHIVS (q) qui mercurium dulcem a granis 6--8 per triduum et post aliquot dies alternis diebus eandem dosin per 3 dies iterum commendare solet.

2) in parca
dosi vti.

d Weisbachius.

§. IV.

Porro non praetereunda est I. G. TRVMPHII LI-PSIENSIS olim MED. LICENT. (r) methodus mercurii dulcis adhibendi ad nostram proxime accedens; verba eius digna sunt vt heic excerpantur. *Mercurius dulcis vtilem hic (nempe scopo saluandi) praestat operam, licet multi sint, qui saluationem ab hoc non semper excitari; sed solummodo sanguinem purificari contendunt. Obseruamus tamen in scabioso excitatam esse lenem saluationem, exhibito ad gr. iv.*

e Trumphius.

§. V.

Inprimis autem hic mihi nominandus est vir summus atque ad restaurandam inque clariori luce ponendam medicinam natus STAHLIVS, qui et primus hanc medendi

f Stahlus.

(o) in med. pract. Tom. I. Tab. IV. de methodo medendi p. 28.

(p) in dissert. de mercur. dulci cap. III. §. V. p. 32.

(q) in der gründlichen Cur aller Krankheiten Classe III. cap. VI. p. 334.

(r) in disp. de saluatione mercuriali p. 9.

dendi rationem inuenit, vt postea ostendemus et parcio-
rem vulgari dosi mercurii dulcis iam in dissertationibus
editis calculo suo adprobavit (r). Legimus ibidem
vulgata mercurialia dissuaderi ac deinde mercurius dul-
cis vsum his verbis proponi: *contentus, inquit, potest esse
medicus, legitimo mercurio dulci, quamuis nullum splendo-
rem exhibente, dummodo etiam nullum usquam saporis ve-
stigium offerente. Cuius moderatissimae doses ad 5 - 6. gra-
na in corpus decenter praedispositum exhibitae, continuatione
aliquot dierum rectissime satisfaciunt proposito scopo; dum
saluationem leniter suscitant et ad progressum etiam suffici-
entem deducunt, tanto magis si per dies eo plures quotidia-
nus illorum vsus continuetur, immo, pro vere perita aestima-
tione circumstantiarum in patiente, procedente iam recto flu-
xu, plane ad vnum aut alterum granum augeatur, fluxus de-
nique totus ita sibi relinquatur, vt donec sponte cesset, nullum
artificiale obstaculum aut quaecunque remora ipsi obiiciatur.*

§. VI.

g Praeses.

Denique **CONSULTISSIMVS D. PRAESES**
PROMOTOR meus aetatem suscipiendus ea quoque,
quae sibi de mercurio dulci in praxi obseruata sunt, pro
sua in me beneuolentia communicauit. Saepius nempe
quatuor ad sex eiusdem grana cum absorbente mixta et
oblatae, vt vocant, inuoluta, scopo leniter saluatorio,
optabili cum euentu dedit in tumoribus glandularum
circa collum exsurgentibus, praecipue illis, qui retropul-
sae imprudenter scabiei suam debebant originem; nec non
in foetidis manantibus vlceribus, proinde etiam in ma-
lignis vlcerationibus ex scabie foeda et variolis residuis;
aliquando etiam in atrophia ex scabie retropulsa ortis, ut
et in catarrho suffocatiuo ex eadem scabie retropulsa na-
to, porro in vehementi humorosa defluxione chronica
intra

(s) vid. dissert. de officio medici erga casus chirurgic. §. XLIV.
p. 38.

intra oculos, cum eximia visus abolitione et initiante pelliculae concretionem ad tunicam adnatam, et cataractam referente affectu: praeterea in fluore albo etiam benigno in certis personis et certa sub methodo; Nec minori cum fructu eandem medelam opposuit foedis et peruicacibus crurum ulcerationibus, quippe hac via foeminam quandam sterilem diro pedis ulcere per octo annos laborantem, sub blando ptyalismo persanata et simul idoneam conceptioni factam fuisse meminit. Con-
suevit autem pulueri huic mane dato, vesperi decoctum aliquod diapnoicum subiungere, laxantibus nonnunquam interiectis.

§. VII.

Ab his non multum abhorret nostra methodus, nisi quod *pauciora* adhuc grana capere ac doseos exiguitatem diuturna continuatione, nisi quidem notabilis effectus subsequatur, compensare suadeat. Videlicet simplicem formulam ex mercurii dulcis rite praeparati subtilissimeque comminuti granis duobus et quintuplo absorbentis cuiusdam ostracodermatis vel solius, vel succo citri semis saturati conficimus, aut plerumque huius proportionis drachmas tres in quindecim partes aequales diuidendas adultis praescribere solemus. Interdum etiam fit, ut duo et dimidium vel tria grana talis mercurii cum absorbente coniungamus; sed priorem doseos molem, uti tutissimam, frequentius elegimus, neque vnquam ad maiorem progredi nos vel utilitatis vel necessitatis ratio coëgit.

3) in parcis-
sima dose
suadet noster
singularis v-
sus
cuius descri-
ptio.

§. VIII.

Hanc ergo minutulam dosin sufficere experti, vniuersalibus siccis vel catharsi vel sanguinis detractio-
ne vel etiam diaphoresi pro varia aegrotantium conditione praemissis, eam quotidie tempore vespertino, ubi cubi-
tum itur, per 10, 20, 30 immo plures etiam, si res postu-
lat, dies sumendam continuandamque praecipimus, do-

modus propi-
nandi.

C

nec

nec aut saluatio largior aut si haec non subsequatur, praesentis mali extirpatio finem facere iubeat. Singulis autem hebdomadis semel laxans vel purgans quoddam, prout hoc illudue ad diuersam subiectorum, morbi, tempestatis rationem accommodatius videtur, interponimus; saepe etiam essentiam pimpinellae albae vel decoctum resoluens ex rad. pimpinell. alb. vincetox. lb. saponariae aliisque praesenti morbo congruentibus, singulis mane bibere, ceterum et topica idonea applicare et si ptyalismus paullo vehementius ingruat, gargarismatibus resoluentibus et adstringentibus mature fauces ab incommodis praemunire aut liberare suademus.

§. IX.

effectus eius
generales.

a. catharticus.

b. aperiens.

c. resoluens

Methodum hanc cum debito regimine, de quo cap. sequenti loquemur, obseruantibus varia nobis apparuerunt phoenomena. Tantum enim abest, vt, quod plurimi fortasse suspicabuntur, semper vberiori saluae effluxu aegros fatigarit, vt saepe etiam teneros molliter educatos, litteratos et inlustri genere ac dignitate conspicuos homines, licet ordinariam pulueris dosin vltra vicissimum numerum quotidie perpetuantes, ab omnibus ptyalismi motibus reliquerit intactos. Ex his autem alii in *diarrhoeam* sub vsu inciderunt non molestant, sed per aliquot dies leniter procedentem interdum recursantem, et sua sponte deinceps finitam; alii haemorrhoidum venas sibi *aperiri* animaduenterunt, exemplo cuiusdam litterati iam quinquagesimum annum supergressi et cataracta correpti, qui fluxum hunc alias sibi consuetum iam vero per biennium resitantem tali modo, vt saepe antea optauerat, recuperavit; alii praeter copiosiorum humorum affluxum ad sedem malorum, quibus laborabant, et placidam vel *resolutionem* vel absterfionem et repurgationem nihil fere per totum curationis tempus senserunt, quod a naturali sanitatis statu alienum esset. In illis quoque

que qui *saluationem* exinde subierunt, magna et memorabilis occurrit operationis differentia. Etenim sicut videre licuit nonnullos a secunda vel tertia dosi protinus in largam saluationem delapsos, quæ per vnam alteramue hebdomadem sine vltiori pulueris vsu constanter perstitit; sic alii post 10, 13 aut 20 mum demum diem lenem huiusmodi euacuationem experti fuerunt. Porro quibusdam accidit vt sub medelæ huius quotidiana ingestione sine causis euidentioribus violentis ptyalismi cursus subsisteret per aliquot dierum interuallum, sponte quasi postmodum sese reuoluens; aliis eadem nihil plane molestiæ faceffuit nec negotiis leuioribus domesticis sese subtrahere compulit, aliis autem maiora creauit faucium incommoda, vt pulueris vsum aliquantis per omittere et interea aliis subsidiis sibi consulere necesse habuerint.

d. saluans

§. X.

Sed satis de generali effectu; iam tempus est ad specialiora transeundi. Non dubito enim, omnes practicos insignem vtilitatem, quam hæc methodus in percurandis *ulceribus* diuturnis et rebellibus nobis attulit, lubentes esse audituros; si quidem in confesso est, sæpe nobis tam dira et nomine *cacoëthi* dignissima mala obuenire, quæ, quicquid agas, diutissime omnem medendirationem peruicaciter contemnunt. In primis sæpe et chirurgorum tentamina frustratur et aegros miserandum in modum torquet perpetuus ille largior feri aqueo salini ad inueterata quaedam vlcera affluxus, vtpote quod præcipue stagnatione acrius factum læsas partes profundius erodit, ossa subiacentia carie inficit, aut saltem appul-
sas simul glutinosas et submucidas lymphæ nutritiæ moléculas corrumpendo absumendoque impedit, quominus hæc conuenienter a natura apponi et explendæ sensim cavitati inseruire possint. Talem igitur infestum affluxum,

*Effectus speciales
a. in vlceribus cacoëtheis.*

vbi semel in consuetudinem transiit, solidae curationi semper obstare et sublato difficillimum esse, nemo expertus diffitebitur, eundem tamen hac methodo perdomitum adeoque vlcera felicissime consolidata fuisse crebro vidimus, et iam sequentium inter plures casuum testimonio confirmabimus.

Casus 1.

de

Virgine vlceribus horribilibus per 4. annos laborante.

Virgo nobilis 20 annorum per 4 annos ex imminutione mensium congestionibus ad caput afflicta, ex plenaria deinde suppressione inflammationem vuulae experta, temerariae chirurgorum medicationi ita subiiciebatur, vt vuula corrupta denique decideret. Accedebant vlcera cacoëthea in pectore, axillis et brachiis vere horrida profunde erodentia adeoque truculentis symptomatibus stipata, vt, quamuis ea patientia animi a Deo exorata ferre ac delinire studeret, tantae tamen calamitati mors ipsa praeoptanda videretur. Nonnulli quidem ipsam ream contagii alicuius venerei facere conabantur, sed vana suspicione magis quam euidentibus documentis commoti. Apertissimum enim erat, chirurgos illam male multasse et incongruentibus septicis vuulam absumsisse, retentionem fluxus menstrui adhuc perstare, vlcera denique ipsa, licet exteriori facie, colore, foetore teterri- ma ac pene intolerabilia fierent, nullum tamen foedae infectionis indicium praebere. Miserac igitur virgini, postquam per aliquot annos dictorum auctorum imperitia in deteriorem statum deducta erat, persuasum tandem fuit, vt hac aestate se in thermas Mattiacas conferret. Illa promte consilium secuta est, sed tam parum inde solatii hausit, vt fere deplorata reuerteretur. Ad postremum ab omnibus cognatis, amicis, et medicis derelicta quantulamcunque a nobis opem petiit, quam etsi promittere non possemus, tamen felici ante factorum experimentorum euentu erecti, quid haec methodus valeret, tentandum denique putauimus. Itaque praemis- sis generalio- ribus

ribus internis resoluentibus euacuantibus, externe dedimus vnguentum ex digestiuis ordinariis cum vnguento Aegypt. oleum myrrhae per deliquium melle chelidon. remixtum addito spiritu vini rectificatissimo camphorato crocato, et emplastro saponato Barbette, vnde meliuscule habere videbatur. Quo facto puluerem nostrum mercurialem per 30 dies vsurpandum exhibuimus, et decoctum aliquod ex rad. vincetox. et pimpinell. albae aut potui ordinario, si vellet, immiscendum aut in forma THEE mane et vesperi hauriendum simul praescripsimus. Haec dum fumeret praeter opinionem saliuatio tertio aut quarto die superuenit, quae deinde tanta cepit incrementa, vt quotidie vnam mensuram, et quod supererat, lymphae acris et falsae corruptae exspueret, gingiuis et lingua valde intumescantibus, faucibus etiam et interioribus oris ardore quodam correptis. Quibus incommodis gargarismate resolvente et linimento occurrere fategimus. Rebus sic habentibus post 12 diem puluerem modo dictum seponi, decoctum vero continuari iussimus; sic vlcera in dies ad oculorum fidem magis magisque abstergebantur, vt intra 14 dies funditus repurgata et consolidata coirent, excepta vna cauitate magnitudinem aciculae vix aequante, quae adhuc aperta madorem quendam vlcerosum identidem plorare videbatur. Omissa licet puluerum vsu saliuatio tamen vti antea procedebat dies noctesque, vt propter serum acre perpetuo affluens nonnulla incommoda circa fauces persentisceret, et aluum per 4 dies aliquando obstructam experiretur, etsi haec sponte deinceps laxationem subierit. Postquam igitur 3 hebdomadibus finitis, serum per saluationem perpetuo excretum falsam et rodentem acrimoniam amittere coepit, propinauimus dosim pilularum ex extracto panchymagog. croll. mercurio dulc. et resina lalappae, 5 sedes prouocantem. Neque tamen hinc ptyalismus cursus

protinus interpellabatur, sed progrediens adhuc pedetentim remisit, incommoda circa fauces interea sensim sensimque evanuerunt, aegra vero ipsa alacritatem animi, somnum placidum, appetentiam cibi hucusque languentem et fere extinctam, nunc eo maiorem audiuoremque recuperavit. De cetero summis laudibus Deum T.O. M. extulit, qui praeter omnem expectationem humanam, ipsam in pristinam sanitatis sortem restitui clementissime voluerit. Peractis 4 hebdomadibus luna decrecente exhibuimus ipsi pilulas balsamicas per 6 dies ad revocandum fluxum menstruum et ad vlcuscula, quae adhuc supererant, plenarie consolidanda ordinauimus oleum myrrhae per deliquium. Quibus feliciter succedentibus ut reliqua mali tam tetri deploratique vestigia delerentur, et roboratione vltima partium, noui affluxus periculum auerteretur, pro colophone spirit. vini camphoratum crocatum applicare suasimus.

*Casus II.
de
Viro ulceri-
bus faucium
et nasi defoe-
dato.*

Vir 59 annorum temperamenti sanguineo-melancholici, laboriosus, vsque ad 13 aetatis annum satis integra valetudine vsus, ac tum variolis confluentibus correptus, aegre eluctabatur; quo factum est, ut congestiones sanguinis versus caput, indeque cephalalgia, ophtalmia etc. crebrius ipsum infestarent. Haemorrhagias narium satis largas vsque ad 30 annum, 36 anno autem singulares congestiones ad nares expertus est, ut guttae rosacea veluti obductae apparerent, rheumaticis deinde doloribus brachiorum succedentibus. Post institutam V. S. in pede incommoda paullatim remiserunt sed nunquam visa sunt plane cessare. Circa 57 annum congestio sanguinis versus vuulam se contulit tanta ferocia et inauspicato successu, ut ea pars non solum vlcere putrido sensim depasceretur, sed corruptelis latius sese disseminantibus, nasus post $\frac{1}{2}$ annum plane concideret; septum enim

nim narium ad os frontis vsque absumtum erat, et in fauces profundus foedissimusque patebat despectus. Tot malis id quoque accessit, vt per vnus anni spatium fere omni cibo ac potu ab nimios cruciatus et deglutiendi difficultatem abstinere deberet, atque adeo tetram mephitin spiraret, vt omnibus ad ipsum propius accedentibus horrorem incuteret et nauseam. Consulti nos illum primo chirurgicis ordinariis medicamentis tractabamus et cum horum ope vlcera quandam deterfionem ac munditiem reciperent, et foetor terribilis infringeretur, sub initium spes affulgebat fore, vt ad optatum finem perveniremus. Cum autem deinde appareret, cariem ossium propter loci incommoditatem aliasque causas nec pharmaceuticis nec chirurgicis remediis decenter auferri posse, hanc quidem medicationem plane relinquere coacti sumus. Nullum itaque praesidium superesse videbatur ad radices huius mali euellendas; quapropter cum idem magis magisque in dies sese diffunderet, ac certam vitae perniciem moliretur, tandem in mentem venit mercurii dulcis, seu *pulueris* ex eo parati, vt vocare solemus, *resoluentis* vsum hic quoque experiri. Adspiravit coeptis diuina benignitas, miserumque et diu afflictum hominem releuauit. Cum enim dictus puluis, primo diaphoresin excitasset, ac deinde mucidos cacoehymicos humores per saluationem strenue expulisset, praesentissimum obtigit lenimentum; quippe post 35 doses assumtas omnis pene dolor euauit, et vlcera, quae iam oculum sinistrum occuparant, nasum totum et dimidiam partem palati exederant, sensim plenius emundata, succrescente noua carne, feliciter coaluerunt. Nihil itaque supererat quam vt ipsi ad praeuertendum nouum affluxum venae sectionem aequinoctialem et subinde laxantia etc. Essent. pimp. alb. commendaremus; sub quorum vfu adhuc dum optime valet.

An-

*Casus III.
de
Ancilla vlce-
re manante
pedum per
XI annos
afflicta.*

Ancilla rustica 27 annorum temperamenti sanguineo-melancholici sub fluxu mensium terrore vehementi perculsa, insequente suppressione, multa pathemata hysterica perpeti debebat. Post varia emmenagoga fortiora a chirurgis adhibita loco fluxus menstrui erysipellate cruris corripitur, quod minus congruenter tractatum in vlcus degenerauit et per 10 annorum spatium complures chirurgos in medendo exercuit. Anno XI. autem haec aegra postmodum nobis se curandam tradebat, multisque ex collegio D. IVNCKERI ipsam ex legibus methodi diligenter tractantibus non parum negotii per 10 menses faceffebat. Neque tamen ex voto successit curatio. Licet enim menses interdum redire ipsumque vlcus repurgari et consolidationi non adeo reniti viderent; tamen largus ille et perpetuus feri appulsus, qui nec laxantibus, nec diaphoreticis auerti poterat, perfectae restitutioni grauissimum obiiciebat impedimentum. Itaque ad puluerem hunc sic dictum *resoluentem* confugimus, datisque eius aliquot dosibus tantum profecimus, vt mensibus prius in ordinem reductis, et cessante affluxu ipsa sanata ad labores pristinos reuerti potuerit. Cum etiam deinceps ex leui quadam cruris allisione idem vlcus recrudesceret, ac propter maturioris medelae neglectum latius et profundius se propagare inciperet, iterum blandae saluationis ope sanitatem recuperauit.

§. XI.

b. in parotidibus.

Possimus plura memoratu dignissima exempla subnectere, sed, ne dissertatio in nimiam excrescat molem, ad alia nobis properandum est, et iam breuiter dicendum de *parotidibus*; quae quantam subinde difficultatem medentibus obiiciant, non est huius loci vberius explanare. Illud satis constat, viscidam ac tenacem in ipsis reperiundam stasim saepe, nisi primis initiis obuiam eatur, nec topicorum discutientium potestati cedere, nec inter-

norum

norum, quae vulgo commendantur, resoluentium armis posse superari. Quid? quod interdum praeter contumaciam grauius inualescunt, febriles vehementes motus accendunt, exquisitisque cruciatibus et exulceratione acri ac rebeli, nonnunquam aegros adeo macerant, ut aliis omnibus irritis in morte solum requies tandem ac solatium inueniatur. Quale exemplum, cum aliquando Inlustris STAHLIO obuenit, auspicato virum experientissimum subiit cogitatio hanc medicationis rationem adhibendi, quam ex voto succedentem deinde feliciter imitatum se esse celeb. D. IVNCKERVS in Tabulis suis (t) testatur. Verba digna sunt vt hic inferantur. STAHLIVS de parotide, quae in tertium annum durauerat, testatur, quod per saluationem feliciter curata fuerit. Adhibitam autem hanc fuisse cautelam, vt leniter institueretur saluatio, usurpatis per diem 2-4 granis mercurii dulcis, adhibitis insuper medicamentis, insensibilem transpirationem promouentibus, et bono seruato regimine. Insuper etiam auctor fuit, vt patiens loco aliorum decoctorum vteretur decocto saponariae et radic. pimpinel. alb. Hac ratione durauit saluatio in quartam usque septimanam, qua feliciter restitutus fuit patiens, cuius pater eodem affectu per exacerbationes misere interiit. Eadem remedia et eandem methodum felici cum successu in sequenti casu adhibuimus.

Virgo inlustrissima 32. annorum per 8. annos parotidibus, magnitudinem oui columbini aequantibus, laborabat, et frustra diu adhibitis multis variisque medicamentis omnem fiduciam recuperandae sanitatis iam ita abiecerat, vt medicum vltimo arcessitum et spem quandam restitutionis proponentem rideret, datumque consilium prorsus aspernari videretur. Sed victa tandem cognatorum precibus, triginta doses pulueris per vices quotidie intra mensem vnum assumsit, idque iam eo ala-

D

crius,

Casus IV.
de
Parotide per
8. annos du-
rante.

(t) In Tab. chirurg. p. 154.

crius, cum post 10 et 20 doses assumtas tumorem sensim decrescere videret. Finito mense iam tantum auxilii allatum erat, vt tumor nucis auellanae molem non excederet. Facilius igitur erat ei persuadere, vt *pulueris* vsum repeteret et per 30 dies adhuc continuandum statueret. Quo facto tota parotis iam funditus eradicabatur vt nullum amplius eius vestigium remaneret. Id autem admirabile omnino maximeque notandum fuit, tantum puluerum effectum sine vlla saluatione, et sola placida ac fere insensibili resolutione post 60 doses assumtas editum fuisse, omniumque expectationem superasse.

Ex his, puto, luculenter apparet tam praeclara huius methodi inuentio, quam admirabilis efficacia, et probabiliter colligi potest, eandem in aliis tumoribus glandulosi refractariis et scrophulis circa collum protuberantibus, nisi iam peculiaris textura accesserit, debellandis peraeque esse valituram; praesertim cum alii iam mercurialia et speciatim aethiopem nigrum scirrhis resoluen-
dis destinasse legamus (u). Ceterum cum optatam huiusmodi virtutem nondum pluribus experimentis cognitam perspectamue habeamus, indubiam successus spem nemini in hisce proponere possumus, placuit tamen ferente sic occasione ea citare, et prudentiorum iudicio experientiaeque relinquere.

§. XII.

*e in catara-
cta incipien-
te.*

Attingimus denique truculentum illum et carissima lucis vsura nos priuantem morbum *cataractam*, cuius intricatam indolem ac diuersitatem licet recentiorum diligentia paullo clarius expediuerit; medelam tamen magna ex parte prorsus incognitam (nam multae cataractae plane insanabiles existimantur) saepe sine operatione frustraneam, saepe hac peracta, infidam esse practici experiuntur.

(u) conf. celeb. D. IVNCK. chirurg. p. 150. No. 32.

untur. Quapropter multi in eam praecipue curam incumbendum esse duxerunt, vt, quando subinde leuioribus indiciis se prodit ac pedetentim ingrauescit, probata quaedam medicatio reperiretur, ad initium tanti mali depellendum aut saltem progressum arcendum idonea. Itaque praeter chirurgicorum praesidiorum V. S. scarificationum menstruarum, fonticulorum, setaceorum adplicationem, itemque praeter generalium catharticonum praescriptionem varia e penu pharmaceutico depromserunt practici, atque in specificum discussionis vsum subinde cum insigni coecutientium leuamine traduxerunt. Cum autem nobis imitantibus, laudatus talium ophthalmicorum successus minus saepe responderet, neque aliunde opem petere aut diuturnis tentaminibus aegros fatigare consultum videretur; placuit denique experiri, quantum hac methodo in principio cataractae ab interno fonte orientis proficere liceret. Siue enim, vti veteres opinati sunt, pellicula tenuis, siue pro recentiorum placitis humoris crySTALLINI opacitas ex subtilissimorum vasculorum obstructione nata hanc oculis caliginem offundere statuatur; spes concipi poterat, e pulueris huius subtiliter *resoluentis* vfu maturo et continuato non nihil emolumenti esse redundaturum. Quam spem quousque impletam videre nobis contigerit, sequentia illustrabunt exempla.

Vir quidam litteratus 44 circiter annorum iam per plures annos ob sedentarium vitae genus, et quotidianam in studiis prosequendis assiduitatem factus hypochondriacus, per litteras querebatur, visum sibi in dies magis debilitari, idque iam tantum incrementi sumsisse, vt prae oculorum caligine scripta perlegere aegerrime valeret. Inprimis notabile erat, obscurum quendam circulum, cum vel candidissimum calamus scriptorium intueretur, ipsi obuersari, minuto quodam centro clariore

Casus I.
de
Cataracta
ex pathemat. hypochond. orta.

vt exprimebat, intermicante. Nos illi conuenientiore
diaetam amplecti iusso, praemissis generalioribus, misi-
mus tum aquam quandam ophthalmicam, tum 30 doses
huius pulueris, quibus decenter intra mensem assumtis
primum insigne leuamen, deinde etiam optatam visus
claritatem recepit. Quamuis, vt ipse rescripsit, nulla
ptyalismus indicia sub aut post vsum se prodere visa sint.

Casus II.

de

Cataracta

*ex obstructi-
one mensium
nata.*

Virgo civilis conditionis 20 annorum crebris lectioni-
bus addicta, postquam in mensium obstructionem incide-
rat, eodem hoc malo conflictabatur adeoque caligabat, vt ma-
gno suo dolore a sacris legendis plane prohiberetur. Persti-
tit hoc vitium per biennium, et quamquam parentes nihil
intentatum relinquerent, ad tollendum id, plurimis, quae
alioquin probatissima fuerant, adhibitis remediis; tamen
eo vsque insanabile et inconcussum remansit. A nobis
quoque multa diu in subsidium vocata sunt ad fluxum
menstruum debite reuocandum, congestiones deriuan-
das et grauiorem hanc nebulam specialioribus ophthal-
micis dissipandam; sed omnibus irritis, necesse erat ad
hunc puluerem confugere, quem postquam tricies ex le-
ge methodi iteratum propinauimus coniunctis simul em-
menagogis; certe cum magna animi voluptate vidimus
hoc solo tantam calamitatem depulsam, virginisque et
parentum desideria fuisse impleta, idque adeo leniter
sine vlla saluatione, vt mitiorem iuxta ac praeclariorem
effectum optare non potuissimus.

§. XIII.

*d. in vlceri-
bus venereis.*

De *vlceribus venereis* & tumoribus in nodis Gal-
licis non est quod quicquam latius adiiciamus, atque
huius methodi praestantiam in iisdem radicibus extir-
pandis pluribus commonstremus. Nam cum mercuria-
lia conuenienter applicata in corruptelis eiusmodi lym-
phatico-spermaticis a specifico contagio pendentibus e-
mendandis et exhauriendis praecipua quadam facultate,

aliis omnibus medicamentis praeponderare concordibus practicum suffragiis iudicentur; tum planissime intelligi potest nostrum puluerem idem auxilium spondere, quin et eo tutiorem magisque idoneum fore, quo euidentius placida resolvente et per saliales aliosque meatus exantlante vi caeteris fere omnibus antecellit. Certe numerosis documentis facile possemus euincere, quantopere tali modo afflictis satis fecerit, eaque cuncta praestiterit, quae ab aliis generosioribus remediis intra tam breue temporis spatium vix exspectaueris. Illud adhuc spe magis praecipimus, quam luculentis testimoniis suffulti asserere audemus, futurum, vt eadem haec methodus scabiei ferinae saepe admodum contumacis acerbitem et ferociam coniunctis aliis subsidiis mitescere compellat; praesertim cum iam alios scabiosos saepe eius ope liberatos fuisse certissimum sit. (y)

§. XIV.

Sed haec aliaque satagentibus rerum suarum practicis vlterius meditanda et experiunda relinquimus, contenti hoc capite methodum hanc singularem pro virium modulo, ac ea, quam dissertatio patitur, amplitudine excussisse. Plura addere non fuit propositum nec sua sit necessitas, cum vnicuique supra citati maxime casus, quorum circumstantias ex sensuum fide sollicitè conscripsimus, attente lecti ac pensitati ad momentum rei dispiciendum diiudicandumque sufficere posse videantur. Ceterum maiorem lucem affundent et ostensam huius methodi vtilitatem, adspirante diuino numine, stabiliunt vberiora experimenta, quae quidem tentare et capere in miserorum solatium, sub debitis cautionibus iam statim indicandis, neminem, vt arbitramur, poenitebit.

e. in scabie
ferina.

f. in scabie
simplici.

commenda-
tio huius me-
thodi.

(y) vid. JVNCK. Conspect. med. Tab. XC. p. 738. in fine.

CAPVT III.

DE MONITIS ET CAUTIONIBVS CIRCA MERCVRII DVLCIS VSVM SINGVLAREM OBSERVANDIS.

§. I.

*Methodus
haec inuat.*

1) nec ubique

*2) nec semper
v.g.*

a. in tumoribus.

b. in ulceribus.

Quemadmodum praestantissima quaeque pharmaca intra certos virium suarum cancellos agunt, ultra quos eadem extendere nefas et temerarium foret, ac praeterea sub vsu iustis cautionum limitibus circumscribenda sunt; sic aequissimum est, idem in hac nostra methodo diligenter attendi. Etsi enim admirabilem sui virtutem in allegatis morbis tuto repraesentarit, tamen ad hanc tanquam ad sacram quandam anchoram in aliis nedum *omnibus* deploratis malis temere confugiendum esse neutiquam existimo, haud ignarus, multos aegrotantes obuenire, quos mercurialium etiam tutissimorum vsus potius in exitium praecipitare, quam incolumitati reddere animaduertitur. Neque affirmauerim, pulverem nostrum nostrum morbos, quibus congruit, tam certo, *semper* depellere, ut nunquam medentium fallat expectationem. Ingenue namque fateor nobis etiam quosdam *tumores* sub axillis et auribus occurrisse, qui pene frustra hac methodo oppugnati sunt, et vel ante speratam resolutionem in abscessum transierunt, vel pertinacissime longo tempore immobiles substiterunt. Neque etiam in *ulceribus* caeothicis putridis semper consummatae curationis voto potiri licuit, quamvis omnium circumstantiarum rationem, quoad eius fieri potest, habere et manifesta impedimenta satis amoliri studuerimus. Idem igitur cum aliis imitantibus forte euenturum esse praeuideam; tamen ex
his

his concludi nequit, remedium esse infidum et contemnendum; sed potius, cum alias saepe profuerit, quemuis decebit in tali casu eo magis attentum solertemque se praestare ad perscrutandos naturae abditos recessus, et causam denique, quae optatum effectum retardat, sagacius inueniendam.

§. II.

In primis autem indagare expedit, num vlcera ex vera scorbutica humorum deprauatione originem ducant, vel inde acrimoniam adhuc suscipiant; an etiam ex concursu sanguinis stricte dicti putrescentis auctiore *cancroideum* foetorem, dolorem, perniciosam erosionem, adeoque diri carcinomatis indolem ostendant; an duntaxat e simplicioribus lymphæ salivæ et feri corruptelis (licet graueolentibus et depascentibus) nata sint, taliumque maxime humorum perpetuo affluxu adhuc dum foueantur et obfirmentur. Quandoquidem pro certo ponitur, in his vltimis puluerem nostrum tutum ac saepe salutarem fuisse, in scorbuticis autem et vere cancris nemini auctores sumus, ut eodem utatur; quippe hic mercurialibus cruciatuum omniumque symptomatum crudelitatem plerumque augeri constat, idque nuper admodum tristi *exemplo* cognitum est, ubi quidam suspecta linguae ulceratione conflictatus, nescio proprio errore an chirurgi hortamento, dissuadentibus omnibus medicis, vnguentum mercuriale adhibuit, seque ptyalismo insequente, iugulavit.

3) Noxia in
ulceribus
cancroideis.

exemplo probatur.

§. III.

Ex hisce pariter apertum est, hanc methodum *scorbutica* labe contaminatis minus salubriter accommodari. Nam cum eorum sanguinem peculiaris acrimonia cum semi putrido statu coniuncta deprauauit, tum verendum est, ne mercurius infestam qualitatem adsciscat, nimiaque resolvendi aut plane solidas partes arrodendi potentia aegros

4) infida in
scorbuto.

3) *intuta in
malo hypo-
chondriaco.*

aegros in vltimum discrimen coniiciat. Quapropter etiam circumspectos practicos ab omnium mercurialium vsu in scorbuto dehortari videmus. (y) Idem iudicium valet de *hypochondriaco malo*, in quo spissitudinem et stagnationem sanguinis in vena portae et annexis eivisceribus adeo non corrigit mercurius, vt potius omnia symptomata vehementius exasperare soleat.

§. IV.

6) *periculosa
in laesionibus
internis.*

Quae cum ita se habeant, multo magis prouidendum est, ne methodum hanc forte illis, qui simul *internis laesionibus* praecipue vlcerosis hecticis, interdum haud adeo manifestis, laborant, applicemus. Enimuero hic anguis in herba latet, quem et mercurius vi sua dissoluendi resuscitare potest, tantamque sensus acerbicatem inferre, vt miseri ex Charybdi in Scyllam incidant, ocyusque consumantur. De *scirrhis* per mercurialia discutiendis, quid alii senserint, iam supra (z) innuimus; at vero praesertim si mere sanguinei sint, si doleant nonnunquam, si aegroti habitus imbecillior aut alia mala coniuncta sint, nos huiusmodi periclitationes refugiendas esse autumamus.

§. V.

8) *Improbata
in hydrope.*

Neque aliter censendum videtur de tumoribus *hydropicis*, vtpote quos plerumque a visceris alicuius vitio oboriri aut sustentari nouimus. Vnum tamen neque id plane silendum exemplum nobis occurrit, vbi ascitico cuidam multis ante medicaminibus exercito, vt iam tumor ex abdomine depulsus in solis pedibus fixus et immobilis restaret, nescio qua fortuna aliquot huius pulueris doses porrectae sunt, eo eventu, vt accepto inopinato,

(y) vid. STAHL, dissert. de scorb. et luis venereae different. p. 23. It. IVNCKER. L. C.

(z) vid. cap. II. §. 8. in fine.

to, leuamine laetus aeger plures huius efficaciae puluisculos sibi dari postularet.

§. VI.

Tutius autem hoc remedium praescribitur eiusmodi *cephalaea* correptis, quam vel status simplex *ulcerosus* vel scabioso-impetiginosae corruptelæ sub cute latentes vel ulcerum alibi manantium suppressio vel denique venerea inquinamenta ciere ac saepe diutissime alere consuecunt. Ecquis enim ignorat, talibus causis cephalaeae inueteratae subigendis ipsam saluationem a practicis subinde opponi, duroque nodo durum adhiberi cuneum? unde et haec methodus tanto commendatior erit, quanto magis commoda et a turbis infligendis remota. Sed tamen omnes circumstantias antea gnauiter expendere atque aliis causis praesentibus simul occurrere conueniet. In ipsa autem *cephalalgia clauo hysterico* nedum in aliis congestionibus & morbis spasmodicis v. g. in *arthritide podagra* etc. insistere huic methodo nulli vnquam suaserimus.

9) *fructuosa in certa cephalaea.*

10) *luctuosa in doloribus spasticis.*

§. VII.

Prospiciendum quoque est ne *infantibus* et *senibus* eneruatis eandem adhibeamus. Etsi enim plerumque placide operetur tamen tenera et infirma huiusmodi subiecta aliquando afficere potest vehementius, atque ob debiti regiminis aliorumque necessariorum intolerantiam grauius periculum intentare. Non minus, antequam huc in morbis sequiorem sexum affligentibus progrediamur, exquirere nos decet, quo tempore fluxum *menstruum* experiri soleant; vt eo cessante, statim hoc curationis genus auspicari et maximam partem intra tempus intermedium absolueret, adeoque turbas et incommoda, quae mercurialia salutari huic euacuationi minitantur, eo facilius auertere possimus. Idem de *praegnantibus* tenendum est, quas potius aliis iucundiore aut leniore sensu foetum et matrem erigentibus, quam tali medicatione tractare par erit. Non possum tamen quin hic *exemplum* apponam grauidæ, non hanc modo curandi

11) *infantibus et senibus promiscue non suadenda. nec menstruat.*

12) *grauitatis non commendanda. licet exemplum in con-*

*trarium af-
fertur.*

rationem sed et alia vulgo suspecta validiora remedia sine noxa perpeſſae. Cruciabatur illa truculentis pathematibus hyſtericis et fluore albo moleſtiſſimo, atque impatientiſſime omnia, quae his malis leuandis ſuffectura iudicari poſſent, deſiderabat. Neque in praefcribendo ſegnem ſe praebuit medicus probatiſſima quaeque antihyſterica etc. ſaepius repetere iubens, vtpote qui pariter ac ipſa mulier nullam grauiditatis ſuſpicionem conceperat; ſed tamen cunctos hoſce conatus morbi pertinacia per aliquot menſes eluſit. Cum itaque afflicta enixius aliorum praefidiorum uſum expeteret apparentibus nullis adhuc grauiditatis indiſciis accepit denique nescio vnde, puluerem hunc reſoluentem et protinus a quarta doſi in ptyaliſmum incidit poſt octo doſes ita increbeſcentem, vt deglutiendi difficultas et copioſus ſaliuae effluxus eſſentiae diſcutientis uſum regimenque diaphoreticum imperare iuberent. Quibus haud ex voto proficientibus ſubiuncto purgante ſaliuatio ad moderamen et finem deinde peruenit, Quin et poſtea varia emenagoga propinata et V. S. in pede adhibitam, ac nihilo ſecius improviſo denique ſanum atque omni ex parte abſolutum foetum excluſum ab hac matre fuiſſe memini. Ex quo uti inter alia huius methodi lenitas intelligitur; ſic tamen imitandi conſilium nemo temere inibit, cum talis caſus ad rariorum ſucceſſuum claſſem pertinere videatur.

§. VIII.

*13) cum aliis
remediis co-
pulanda.*

*a. vniuerſa-
libus.*

*b. ſpeciali-
bus.*

Ceterum quicumque hanc methodum congruentibus morbis applicandam eſſe decernit; illum ſimul de aliorum quoque medicamentorum commode aptandorum ſubſidio cogitare neceſſe eſt. Neque enim generalia aut ſic dicta *vniuerſalia* ubiuis ſine detrimento negligi poſſunt, neque *ſpecialia* e. g. in vlceribus externa detergentia, mundantia, baſamica vilipendenda ſunt. Quae ſi oſcitanter fiant aut plane praetermittantur, ſolidae curationi *remoram* iniici, lentumque et ſpe multo inferiore effe-ctum ſubſequi obſeruauimus.

§. IX.

§. IX.

Id quoque experturos curae cordique habere oportet, ut si qua *incommoda* sub usu huius methodi impendant aut existant, mature paullo maiorem eorum impetum antevertere, aut infringere et retundere conentur. Non enim dissimulandum est, interdum vires inde debilitari ciborum appetentiam minui et nauseam moveri, aut praecipue ubi ptyalismus imminet vel procedit, insignem aliquando lassitudinem artuum, faucium, linguaeque tumorem ac deglutiendi difficultatem superuenire. Quae molestia licet identidem a natura sponte vincantur, tamen etiam saepe auxiliatricem artis operam deposcunt. Cauendum autem est, ne aegrotus culpa sua grauiora, quam alias insequi solent, mala sibi contrahat, ut accidisse recordor cuidam puellae, quae cum ad vlcuscula faciem turpiter defoedantia non mediocri successu puluerem hunc vsurparet, post aliquot dierum usum siue ex impatientia siue alio errore duas doses simul contra praescriptum vesperi absorpsit, indeque sibi tot *incommoda* circa fauces praecipue creauit, ut ante decimum quartum diem ad quietem et integritatem pristinam reduci non potuerit.

*praecipue
in sympto-
matibus.*

§. X.

Vltimo *diaetae* et regiminis quoque quaedam ratio habenda est, nam his plane despicatui habitis multos grauiore molestia aut saltem tardiore prosperae curationis exitu negligentiam suam luisset animaduertimus. Quocirca aequum erit iniungere afflictis, ut dum hoc remedio vtuntur, moderato et aequabili calore cibo modico molli et euchylo, potuleni claro vel ex ordinaria modo probe defoecata nec acorem indepta cereuisia, vel ex decocto radicum et herbar. conuenient. C. C. hordei cum passulis maioribus etc. corpora sua reficiant, omnem autem refrigerationem, coelum humidum tempestuosum, cuncta acida salina acria, denique et turbas ac permotiones animi quoquo modo deuitent. Quod si fiat, utique

14) diaeta.

nobis licebit, esse securioris quamuis me minime praete-
reat, plurimos, quos hoc medelae genere nos curandos
suscepimus, ad exactas huiusmodi diaeteticarum praecep-
tionum leges se nunquam attemperasse (cum rei familia-
ris cura illis potior magisque necessaria duceretur) et ni-
hilominus, a reformidatis alias incommodis liberos,
perfecte tandem conualuisse.

F I N I S.

Dogmata qui medici solers scrutatus in arte es,
Intentus metae non remorante pede,
Numinis auspicio superans fastigia tandem,
Iam poscis meritis praemia digna tuis.
Perge igitur felix! felix ascende cathedram,
Quam non invitus pandit Apollo tibi.
Annuat ipse Deus coeptis et cuncta secundet
Conatusque tuos integritate beet.
Sic dulces poteris fructus gustare laborum,
Sic miseris veniet, te veniente, salus.

*Praeclare docto Domino Candidato fausta quae-
ritis apprecans adiecit*

Fridericus Hoffmannus.

LAurea certamen sequitur Pugnamque triumphus,
Praemia labores condecorare solent.
Hinc est quod Tua nunc Havighorsti tempora cingat
Purpura Te digna; Teque sequatur honos.
Merita quapropter laborum praemia grator,
Succedant votis prospera cuncta Tuis.

*Auditori honoratissimo, solerti, et Dignitate Do-
ctorali promerita decorando, gratulabundus
applaudit.*

Georgius Daniel Coschvitz
M. D. P. P. O.

Mercurii *medicam* virtutem ostendis AMICE,
Sed quis perspiciet *chymica* quid valeat?
Sic *ex parte* licet tantum cognoscere *partes*:
Totum de toto non nisi Numen habet.

*Haec praenobilissimo Candidato, qui summos ar-
tis medicae honores digne iam sortitur, in me-
meriam amoris festinante calamo scribere
voluit*

D. Ioannes Iuncker.

Sic fuit, est, et erit, summum quicumque lehouam
Vero corde colit, pura quia mente colendus,
Post mala multa etiam tandem hic maclatur honore,
Nam bona sunt submixta malis, lacrymasque sequuntur
Gaudia, si ineassum non tempus nobile transit,
Quod nunc hocce *Tuum* specimen satis exhibet, inde
Praemia digna capis, dum non sine laude resoluens
In medium profers quoddam praestans medicamen,
Effectu cuius laudem *Tibi* promeruisti,
Ad quam sincerus gratatur amicus Amico,
Exoptatque bonos progressus mente fideli,
Utque aegris semper *Tua* sit medicina leuamen.

*Quae pauca in honoris et amicitiae testimonium
adiicere debuit amicus TVVS*

I. D. E. Med. Doct.

Concertant Physici (sed adhuc sub iudice lis est)
Nec, quae Mercurii sint elementa, probant.
Quaerentes pungunt, fugiuntque abstrusa veneni,
In sublimato, spicula, Mercurio.
Mercurium fixum Chymici venantur, at illos
Saepe etiam fallax ludificatur auis.
Certius et pulchrum est, vsum lustrare medentem,
Atque inuenta nouis amplificare modis;
Ut, Cognate, iuuat Te iam docuisse salutem,
Quae noua, Mercurio subueniente, datur.

Gratu-

Gratulor hoc specimen, pariter fructumque laborum
Non vanum, praesens quos comitatur honos.
Ipse Deus clemente manu tua coepta secundet
Practica, et adiunctum perleue reddat onus.
Sic solidam praestabis opem languentibus, atque
Laetus eris crebro Te feriisse scopum.

Sic gratulabundus accinit et Consobrino suo dilectissimo omnigenam felicitatem precatur

G. Gerlacius,

Oldensalia Transilanus.

Quamlibet gnavis humeris molestum
Iniicit pondus labor atque cura,
Ut putes grandes tibi submouendos

Esse molares:

Attamen notum, fieri labores
Antea tergum grauitur prementes
Postea factos valide suaues,

Nectaris instar.

Si syphi pondus nihil is volutat,
Qui suos ausus moderante sancto
Expedit flatu, studiumque iusto

Ordine tractat.

Namque conatus toties receptus
Dum suas metas sequitur tenetque,
Efficit laetos animos, & arcta

Membra relaxat.

Mens memor tantum remanet laboris;
Vix subit nostros animos imago
De graui sensu variisque nostris

Viuida curis.

Gutta sudoris peramara cessat:
Nec tuus vultus tegitur madente
Amplius stilla, quibus ipse musas

Vngit Apollo.

Quando enim fructus capimus laborum,
Tunc quasi emanant refluuntque acerbo
Fonte pergrati latices saporis,

Flumina lactis.

Sic

Sicque pro claris lacrimis refertur
Fructuum dulcis sapor, ac beatis
Ausibus nostris fruimur, quod angens
Cura recessit.

Tu Tuas claras, *Hauighorste*, curas
Perpeti ornasti studio, recusans,
Quae facessuit medicina sollers,
Pondera nulla.

Saepe naturam meditatus, amplum
Naetus es campum, roseo rubore
Flosculos ex quo caperes, Tuaque
Cresceres arte.

Inde Doctoris titulum mereris
Quem Tibi musae tribuent Galeni;
Praemium tanto studio ferendum;
Quod Tibi grator!

Praxeï coeptae faueat supremum
Numen! Et curas miserum secundet!
Patriae ut toti domuique grata
Munera praestes.

*His Candidato dignissimo ad Doctoris in arte Medica gra-
dum aspiranti, laudabile propositum gratulatur*

Io. Franciscus Bernd,
S. S. Theol. Cult.

SU man Dein werthes Haupt umgiebt mit Palmen-Kränzen,
Mein theurer Jonathan; so fordert meine Pflicht
Dir wohlverdientes Lob, und einen Wunsch zu schenken.
Drum stimm ich freudig bey, da Mercur selbst ausspricht:
Weil Du die Tugenden von mir hast wollen schreiben,
Will Ich der Nach-Welt Dich nach Würden einver-
leiben.

Hiermit wolte dem Herrn Respondenti als sei-
nem werthesten Freunde, seine schuldigste ob-
servantz bezeugen, und zu desselben rühmlich-
sten Vorhaben alles gedenliche Glück von Her-
zen angewünscht haben

Desselben beständigster ergebenster Freund und Diener

W. R. C. Haß, Osnabr. Westphal. LL. C.

Als man Dich krönete mit längst verdienten Zweigen,
Wolt ich, mein Wehrter Freund glückwünschend mich
bezeigen.

Raum hatt' ich Deinen Ruhm zu schreiben angefangen,
Da kam ganz unvermerckt Hygeia angegangen
Und sah von hinten zu auf die gemachte Sachen
Drauf sprach Sie lächelnde: Was wilst du armer machen?
Dein Kiel ist nicht geschikt verdienten Lob zu geben,
Das Werck soll meinen Sohn als Meister mehr erheben.

Hiermit hat seinen herzlichgeliebten Gönner und
Freunde, zu seiner schon längst verdienten Do-
ctor-Würde herzlichlich glückwünschen wollen
dessen treuer Freund und Diener

Theod. Wilhelm Grothaus.
aus Osnabrück der Arzney besitzener.

Qui magnam sacrae Medicinae condidit artem,
Felicem Medici qui facit esse manum,
Ille Tuis adsit coeptis, dextramque gubernet,
Aegris quo dextre consuluisse queat.
Haec precor, haec voueo; omnipotens mea vota secundet;
Ut viuas laetus, laetaque vota trahas.

*Ita vouet, et Fautori atque Amico per dilecto ani-
mitus gratulatur, eique plurimos inuiden-
dos in praxi exoptat successus,*

A. P. Meyer Leuera-Mindensis LL.C.



